



Broj: 02-08-Gp-87/19
Sarajevo, 28.08.2019. godine

**GRAD SARAJEVO
GRADSKO VIJEĆE**

PREDMET: Obavještenje o podnesenoj Prijavi o izvršenju krivičnog djela.
-DOSTAVLJA SE-

Postupajući u skladu sa aktom Gradskog vijeća Grada Sarajevo br. 01-GV-02-289-6/18 od 28.02.2018. godine, kojim je Pravobranilaštvu Grada Sarajevo nalaženo da podnese krivičnu prijavu u odnosu na načelnika općine Istočno Novo Sarajevo Ljubišu Ćosića radi postavljanja plakata na zgradu Općine sa likom ratnog zločinca Ratka Mladića, Pravobranilaštvo Grada Sarajevo je postupilo u skladu sa nalogom, te je dana 20.04.2018. godine, svojim aktom br. 02-08-Gp-63/18 podnijelo prijavu o izvršenju krivičnog djela.

Dana 23.08.2019. godine Pravobranilaštvo Grada Sarajevo je zaprimilo akt broj: T 17 0 KT 0009883 18 Okružnog javnog tužilaštva u Istočnom Sarajevu, kojim smo obavješteni da se po podnesenoj prijavi u odnosu na Ljubišu Ćosića, načelnika općine Istočno Novo Sarajevo, neće sprovoditi istraga jer ne postoje osnovi sumnje da je prijavljeno lice učinilo krivično djelo, te Vam navedeni akt dostavljamo u prilogu.

DOSTAVITI:

- Naslovu
- U spis

**ZAMJENIK PRAVOBRANIIOCA
GRADA SARAJEVO**

Besim Musakadić s.r.

23. 08. 2019.

BOSNA I HERCEGOVINA
REPUBLIKA SRPSKA
OKRUŽNO JAVNO TUŽILAŠTVO U ISTOČNOM SARAJEVU
BROJ: T 17 0 KT 0009883 18
Istočno Sarajevo, 19.08.2019. godine

Na osnovu člana 224, stav 3. Zakona o krivičnom postupku Republike Srpske („Službeni glasnik RS“ br. 53/12, 91/17 i 66/18), donosim

N A R E D B U

Neće se sprovoditi istraga protiv Ljubiše Čosića, načelnika opštine Istočno Novo Sarajevo, zbog krivičnog djela Javno izazivanje i podsticanje nasilja i mržnje iz člana 359, stav 1. Krivičnog zakonika Republike Srpske („Službeni glasnik RS“ br. 64/17), a povodom krivične prijave od 20.04.2018. godine koju je ovom tužilaštvu podnijelo Pravobranilaštvo Grada Sarajeva, Kanton Sarajevo, Federacija BiH, jer *ne postoje osnovi sumnje da je prijavljeno lice učinilo krivično djelo.*

O b r a z l o ž e n j e

Pravobranilaštvo Grada Sarajevo je dana 27.04.2018. godine Okružnom javnom tužilaštvu u Istočnom Sarajevu podnijelo krivičnu prijavu br. 02-08-Gp-63/18 od 20.04.2018. godine protiv Ljubiše Čosića, načelnika opštine Istočno Novo Sarajevo zbog krivičnog djela Javno izazivanje i podsticanje nasilja i mržnje iz člana 359, stav 1. Krivičnog zakonika RS.

U krivičnoj prijavi je navedeno da je Ljubiša Čosić počinio krivično djelo Javno izazivanje i podsticanje nasilja i mržnje iz člana 359, stav 1. Krivičnog zakonika RS na način da je dana 24.02.2018. godine i 26.02.2018. godine, kao načelnik opštine Istočno Novo Sarajevo, dao nalog da se na zgradi Opštine Istočno Novo Sarajevo postave plakati sa likom Ratka Mladića, koji je presudom Međunarodnog suda za ratne zločine počinjene na području bivše Jugoslavije proglašen krivim za ratne zločine počinjene u Bosni i Hercegovini. Prema daljnjim navodima prijave, nakon što je navedeni čin prijavljenog medijski propraćen, prijavljeni je izjavio da je lično naložio postavljanje plakata sa likom Ratka Mladića, kao i da će takođe naložiti postavljanje isuših plakata u boji, te je isto i učinio 26.02.2018. godine. U prijavi je istaknuto da je takvim svojim postupkom prijavljeni „*grubo povrijedio nacionalna osjećanja drugih, prvenstveno Bošnjaka, koji su također konstitutivni narod kako u Entitetu Republika Srpska tako i u cijeloj državi Bosni i Hercegovini*“, zbog čega, prema shvatanju podnosioca prijave „*napraved navedeno djelo predstavlja ništa drugo do uništajno i javno poticanje međunacionalne mržnje i netrpeljivosti, što je u državi kakva je Bosna i Hercegovina jako nepotrebno i opasno i što ne može bilo kome donijeti bilo kakvu korist osim promociju prijavljenom, te predstavlja povredu nacionalnih osjećanja drugih konstitutivnih naroda, a najviše uvredu za porodice žrtava*“.

U cilju provjere navoda iz krivične prijave, ovo tužilaštvo je Policijskoj stanici Istočno Novo Sarajevo uputilo zahtjev za prikupljanje dokaza.

Policijska stanica Istočno Novo Sarajevo je dana 25.07.2019. godine tužilaštvu dostavila Službeni materijal br. 16-02/1-85/19 od 19.07.2019. godine, sačinjeni na okolnost razgovora sa prijavljenim Ljubišom Čosićem, sa Slavicom Stjepčevićem, načelnikom Komunalne

policije Istočno Novo Sarajevo i Vasom Elezom, sekretarom Boračke organizacije opštine Istočno Novo Sarajevo, dana 15.07.2019. godine. Iz navedenog materijala proizlazi da je Ljubiša Čosić, načelnik opštine Istočno Novo Sarajevo, tom prilikom izjavio da su prostorije na kojima su zalijepljeni plakati sa likom Ratka Mladića date na korišćenje Boračkoj organizaciji opštine Istočno Novo Sarajevo, te da on nema ovlaštenja naredbodavne prirode prema toj organizaciji, tako da za lijepljenje plakata sa likom Ratka Mladića nije dao ni pismeni ni usmeni nalog. Prijavljeni dalje navodi da od dana postavljanja plakata, pa sve do vršenja ovih provjera nije bilo pritužbi građana koje bi se odnosile na osjećaj uznemirenosti zbog plakata, niti je bilo organizovanih protesta u vidu javnog okupljanja građana, postavljanja transparenta na javnim mjestima ili drugih načina izražavanja nezadovoljstva građana zbog plakata.

U materijalu je dalje navedeno da je Slaviša Slijepčević, načelnik Komunalne policije Istočno Novo Sarajevo izjavio da komunalna policija nema ovlaštenja da uklanja ove vrste plakata, jer isti nemaju komercijalni karakter, a postavljeni su sa unutrašnje strane prozora Boračke organizacije opštine Istočno Novo Sarajevo, tako da bi u ovakvim slučajevima Komunalna policija mogla reagovati samo kada bi bilo pritužbi građana Ombudsmenu za ljudska prava, na osnovu kojih bi isti naložio uklanjanje plakata po čemu bi odjeljenje Komunalne policije bilo dužno postupiti. Međutim, kako nije bilo pritužbi, onda nije bilo ni potrebe za uklanjanjem plakata.

Vaso Elez, sekretar Boračke organizacije opštine Istočno Novo Sarajevo je, u izjavi prilikom razgovora sa ovlaštenim službenim licima Policijske uprave Istočno Sarajevo, izjavio da je Boračka organizacija samovoljno izvršila postavljanje plakata. „*bez ikakvih naredbi ili sugestija od načelnika opštine Istočno Novo Sarajevo Ljubiše Čosića*“ te da su plakati postavljeni „*u znak podrške Ratku Mladiću, koji je bio vrhovni komandant VRS, a kome se u to vrijeme trebalo izreći presuda u Hagi*“.

Dalje, u predmetnom službenom materijalu se navodi i da je provjerama utvrđeno da u periodu od postavljanja fotografija do dana službene provjere nije bilo prijava koje su se odnosile na postavljanje plakata sa likom Ratka Mladića, niti su bila najavljena javna okupljanja u znak izražavanja nezadovoljstva zbog postavljanja ovih plakata.

Analizom raspoloživog dokaznog materijala u ovoj krivičnoj stvari, zaključujem da ne postoje osnovi sumnje da je prijavljeni Ljubiša Čosić učinio krivično djelo koje mu se prijavom stavlja na teret.

Zakonska obilježja krivičnog djela Javno izazivanje i podsticanje nasilja i mržnje iz člana 359. stav 1. Krivičnog zakonika RS su određena na sljedeći način: „*Ko putem štampa, radija, televizije, kompjuterskog sistema ili društvene mreže, na javnom skupu ili javnom mjestu ili na drugi način javno poziva, izaziva ili podstiče ili učini dostupnim javnosti letke, slike ili neke druge materijale kojima se poziva na nasilje ili mržnju usmjereni prema određenom licu ili grupama zbog njihove nacionalne, rasne, vjerske ili etničke pripadnosti, boje kože, pola, seksualnog opredjeljenja, invaliditeta, rodnog identiteta, porijekla ili kakvih drugih osobina, kazniće se...*“

Iz interpretacije bića ovog krivičnog djela je, između ostalog, vidljivo da je jedan od njegovih ključnih faktora činjenica da je učinilac učinio dostupnim javnosti slike ... kojima se poziva na nasilje ili mržnju usmjerenu prema određenom licu zbog njegove nacionalne... vjerske ili etničke pripadnosti...“

U konkretnom slučaju, a kako to proizlazi iz prikupljenog materijala PU Istočno Sarajevo br. 16-02/1-85/19 od 19.07.2019. godine, izjava prijavljenog Ljubiše Čosića u kojoj negira da je on naredio postavljanje fotografija sa likom generala Ratka Mladića na objekat Opštine Istočno Novo Sarajevo (tačnije na dio objekta koji koristi Boračka organizacija opštine Istočno Novo Sarajevo), potkrijepljena je i izjavom Vase Eleza, sekretara Boračke organizacije koji je istakao da je Boračka organizacija samovoljno postavila plakate. „*bez ikakvih naredbi ili sugestija od načelnika opštine Istočno Novo Sarajevo Ljubiše Čosića*“.

Takođe, iz dokaza u spisu predmeta proističe da Boračka organizacija opštine Istočno Novo Sarajevo, koja koristi prostorije na koje su postavljeni sporni plakati nije „potčinjena“ Ljubiši Čosiću kao rukovodiocu, zbog čega nije realno ni očekivati da prijavljeni izdaje bilo kakve naloge i naredbe u odnosu na ovu organizaciju, pa tako ni naloge i naredbe u pogledu postavljanja spornih fotografija na objekat koji koristi Boračka organizacija.

Nadalje, prikupljena dokumentacija upućuje na to da u periodu od postavljanja fotografija generala Ratka Mladića do dana službene provjere, postavljene fotografije nisu izazvale uznemirenje građana Grada Istočno Novo Sarajevo u vidu javnog okupljanja, protesta, transparentata na javnim mjestima i drugih oblika izražavanja nezadovoljstva građana postavljenim fotografijama, niti su službe Policijske stanice Istočno Novo Sarajevo ili Policijske uprave Istočno Sarajevo imale prijavu ili najavu takvih okupljanja ili saznanja o mogućem okupljanju građana kao posljedice izlaganja fotografija generala Ratka Mladića na prostorijama Boračke organizacije.

Tužilaštvo objektivno prihvata mogućnost da bi objavljena fotografija Ratka Mladića kod pripadnika drugih nacionalnosti (prvenstveno Bošnjaka) mogla izazvati nezadovoljstvo i neprijatnost, međutim za postojanje krivičnog djela Javno izazivanje i podsticanje nasilja i mržnje nije dovoljno samo izazivanje takvog osjećaja, nego je neophodno, a kako je to prethodno navedeno, da se činom objavljivanja takve fotografije „*poziva na nasilje ili mržnju usmjerenu prema određenom licu zbog njegove nacionalne...vjerske ili etničke pripadnosti*“. a u kontekstu ovog slučaja je kao razlog objavljivanja predmetne fotografije navedena „*...podrška Ratku Mladiću, koji je bio vrhovni komandant VRS, u kome se u to vrijeme trebala izreći presuda u Hagu*“, od strane članova Boračke organizacije koji su bili pripadnici vojske čiji je Ratko Mladić bio komandant. Naime, kod ovako postavljenih stvari, nije dovoljno vidljiv umišljaj, koji je kao subjektivni element nužan za postojanje navedenog krivičnog djela, tačnije, dato stanje stvari ne navodi na pouzdan zaključak da je prilikom objavljivanja fotografije postupano sa umišljajem i da je cilj objavljivanja bilo pozivanje na nasilje ili mržnju.

Iz navedenih razloga, a u skladu sa članom 224. stav 3. Zakona o krivičnom postupku RS, odlučeno je da se istraga neće sprovoditi.

U smislu člana 224. stav 4. Zakona o krivičnom postupku RS, podnosilac prijave ima pravo da na ovu odluku podnese pritužbu kancelariji tužioca ovog tužilaštva u roku od osam dana od dana prijema odluke.

OKRUŽNI JAVNI TUŽILAC

Rajko Čolović, s.r.